



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 421 vum 5. Mäerz 2024 vun der honorabeler Deputéiert Madamm Alexandra Schoos.

1. Wéi gesäit de Suivi aus, a Bezuch op de Statut vaccinal, wann d'Schüler d'Impfkaart net dobäihunn, fir och an dëse Fäll en adequate Suivi bei alle Kanner a Jugendlechen ze garantéieren

Am Fall wou Schüler am Kader vun der Schoulmedezin ënnersicht ginn, an d'Impfkaart net konnt kontrolléiert gi well si net matbruecht gouf oder verluer ass, da kréien d'legal Verrieder vum Kand e Bréif dee freet dass si bei hirem Hausdokter d'Impfsituatioun vum Kand kontrolléiere loossen. Eng Informatiounsfiche mat de resüméierte Recommandatioune gëtt mat geschéckt fir z'erënnere wéi eng Impfungen a wéi engem Alter néideg sinn.

2. Wéi eng Méiglechkeeten hunn d'Dokteren op där enger Säit an d'Santé op där anerer Säit, fir kënnen e bessere Suivi ze maachen an de Leit Rappeller ze schécken, datt hir Optrëschung fälleg ass?

Doktere kënnen momentan den Impfzoustand vun hiren erwuessene Patienten nëmme kontrolléieren andeems si Patienten e reegelméisseg Suivi proposéieren an dobäi bei jidder Impfung d'Impfkaart systematesch ausfüllen, d'Impfung am Patientendossier dokumentéieren a bei all Patient d'Impfkaart systematesch nokucken. D'Santé huet keen Accès zu dësen Donnéeën.

3. Falls et momentan nach keng automatesch Rappeller fir Optrëschunge gëtt (weder vun der Santé nach vun den Dokteren), gesäit d'Regierung am Kader vun der Digitaliséierung an Zukunft eppes an deem Sënn vir?

De *Carnet de vaccination électronique* (CVE), deen aktuell an enger Pilotphase ass, ass e méigleche Moyen fir de Leit automatesch Rappeller ze schécken, wann eng Impfung fälleg ass. Den Algorithmus, deen am Programm integréiert ass, baséiert sech dobäi op Recommandatioune vum Conseil Supérieur des Maladies Infectieuses (CSMI) a gëtt aktualiséiert wann eng nei Recommandatioun vum CSMI geholl gëtt. Doktere kënnen och déi selwecht Informatiounen a Rappelmessages am CVE vun hire Patienté gesinn. E generaliséiert Benotze vum CVE vun den Doktere géif et och erméiglechen den Impfzoustand vun der Bevëlkerung ze kennen, an esou néideg Informatiounscampagnen z'initiiéieren falls festgestallt gëtt dass den Impftaux fir e Vaccin an der Populatioun erof geet.

4. Duerch d'Pénurie am Gesondheitssecteur ass et immens schwéier als nei Patient nach Rendez-vous bei Generalisten ze kréien. Huet d'Regierung Informatiounen doriwwer, wéi vill Generalisten hei am Land momentan keng nei Patienté méi unhuelen? Gëtt et eng zentral Ulafstell, wou d'Leit sech informéieren kënnen, wéi eng Généralisten hei am Land nach nei Patienté unhuelen?

De Beruff vum Dokter gëtt gréisstendeels liberal zu Lëtzebuerg ausgeübt an den einzelnen Dokter decidéiert selwer wéi vill hie schafft. Domat huet de Staat keng Informatiounen doriwwer op verschidden Dokteren nach Patienté unhuelen oder net.

Lëtzebuerg, den 4. Abrëll 2024

D'Ministesch fir Gesondheet
a sozial Sécherheet

(s.) Martine Deprez